



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Ethiopia PM-i Sudan army tekolakba den ajurutep

Euro nung goal idaktsüba asayar tanobusang Yamal kumogo



VOL. XXI ISSUE NO. 269 (ADOK 269) DIMAPUR YANGTEPNÜ (THURSDAY) CHITENI (JULY) 11, 2024 ₹ 5.00

PWDs atema 'free travel facilities' tenzükter

Dimapur, July 10, 2024 (TYO): Nagaland State Transport Department-i Rights of Persons with Disabilities Act, 2016 nung Section 41 mapa kuma tenzükba osang metetdaksüogo.

Iba ajanga persons with disabilities (PwDs) nem bus stops, railway stations aser airports nung transportation facilities agütsür aser iba nung parking spaces, toilets, ticketing counters aser ticketing machines dena lir.

Nagaland telongtet nung NST passenger bus garitem nung PwDs angati senzüdaktsütsü ta Transport Department-isa metetdaksü.

NST nung free travel facilities angutsü atema Persons with Benchmark Disabilities (PwBDs) jangjatsü atema Unique Disability Identity (UDID) Card amshitsü. Iba card ya Department of Empowerment of Persons with Disabilities (DEPWD), Ministry of Social Justice and Empowerment, Government of India ajanga agütsür.

UDID melira Authorized

Medical Board ka nungi valid disability certificate alirtemi dang free travel facilities angutsü ta Department-isa ashi.

General Manager, NST, Nagaland, Dimapur indang officie nung Rs 50 agütsür free travel pass angutsü aser ibaji kum ana sülen Rs 20 agüja renew asütsü akok ta parnokisa ashi.

Iba free travel pass aginürtemi General Manager, NST, Nagaland, Dimapur Office mesüra District NST Office nung application agütsütsü akok.

PwBDs meinertemi jelia PwBDs den külemi amentsü atema menden mekazüktsü saka para ajunga (full fare) agütsütsü. Ajisüaka 80% PwBD pur, shirnok teyari nungdaker parnok asoshibo associate/assistant ka atema free travel facility agütsütsü, ta Transport Department-isa metetdaksüogo.

Iba free travel facility ya bus gari ka nung menden 4 atema dang agütsütsü. Mendenji driver amenba sülen mezüngbuba aser tanabuba rows nung asütsü ta parnokisa ashi.

Dimapur nung GB ka gari lendong nung asü

Kohima, July 10, 2024 (TYO): Bodbarñü Kohima district kübok Kiruphema nung tanep 11:00 ako meta gari lendong ka nung Diswang Hau ta ser nisung ka asü. Diswang-i lenmang nung gari ka adena sütsü merangdang pai aniba Swift Dzire (NL07CA 3711) gariji mazüokteti kilentzü yimokdak ka nung oa tsüok ta osang anagzüker.

Dimapur nung Joint Council Forum (JCF)-i NST Colony nung GB Diswang Hau kanga dang ajungbeba asüba atema aoksaba aser mang ayimba metetdaksüogo.

Hau ya public lennir tajung ka liasü aser pa ya kanga tenendak, ochishir aser lokti asoshi bendanga agüja inyakba lennir ka liasü ta JCF Convener Pikato Chishi aser Secretary Omega G. Naga nati sangdong ka nung ashi.

Pai nübortem asoshi bendanga agüja inyak aser pa malibaji kanga metettsü. Hau kanga dang ajungbena asüba ya JCF aser Dimapur nung alir ajak asoshi takoksa tulu lir, ta tenatisa ashi.

Pa mapa tajung inyakteta yutsüba ajanga forum teti ajungmesotsü aser pai lokti asoshi mangdang ayubatem onoki inyaka aotsü, ta JCF-isa metetdaksü. Parnokisa asür kibong den asükhu lemsatepba den Tsüngremi nungi tashi aser tesünep meshija sarasademtsüba metetdaksüogo.

Asür Diswang Hau den asüpila sentep sentongji Brihostibarñep 8:00 ako nung TPM Convention Ground Dimapur nung agütsü aser iba sülen Peren district kübok Poilwa yimtsüng nung mang aremstsü atema bener aotsü.

NIA-i Manipur nungi nisung 3 Delhi-i anir ao

Guwahati, July 10, 2024 (Agencies): National Investigation Agency (NIA)-i Mongulbar aonung Manipur nungi telungpur ta temulung melemi bilemer nisung asem New Delhi-i anir ogo.

NIA intelligence nung ajemdaker Manipur Police aser CRPF sepaitemi L Hengjol yimtsüng mita aodang par asem apu.

Nisung asem ya Thangjoel Haokip (19), Jangjoulen Khongsai (19) aser Jangminlun Singson (45) nung ta jangaogo aser parnokki ozüng

alema mapa inyakba nung shilem agi ta temulung malemer. April 2024 nung tapoktsü amshia power grid ka amakba nung parnokki shilem agi ta temulung melemi bilemer.

Kangpokpi district nung par asem apuba sülen nisungtemi parnok chiochtsü aser prangpong meyipa agütsütsü takhangba agüja lungkak aitsü tenzük.

Par apuba asem atema Kuki Inpi Manipur-i Bodbarñü Kuki nung aliba tesemtem nung ghonda 12 mokdangtsü ayongzüka agiogo.

Nagaland nem 'Best State in Horticulture Award 2024' agütsü



July 10, 2024 nü Hotel Holiday Inn, New Delhi nung Women Resource Development & Horticulture Minister Salhoutuonuo Kruse-i 'Best State in Horticulture Award 2024' sempet agizükba angur.

Dimapur, July 10, 2024 (TYO): 15 buba Agriculture Leadership Awards nung Nagaland nem 'Best State in Horticulture Award 2024' agütsüogo.

Nagaland nung Horticulture development ajanga sentong aser asalentong tajungtem yangluba ajanga aluyimertem aser yimtsüng nung alirtem ajangzükdaksüba atema iba sempet agütsü.

Bodbar nikongdang Hotel Holiday Inn, New Delhi nung Agriculture Leadership Conclave agidang Women Resource Development & Horticulture Minister Salhoutuonuo Kruse-i sempet agizük.

Agriculture Leadership Awards ya 2008 nungi tenzüka agütsür aser India nung aluyimbaren aser yimtsüngtem

nung azükaru bentsür aruba atema kija aser teloktem nem sempet agüja arur.

Nagaland nung horticulture sector ya 'Sunrise sector' ta züngshir aser iba ajanga sempet agütsüogo. Nagaland nung Horticulture maparen ajanga nübortem libaliro tajungba kümdaktsüogo aser aluyimertem rongsenketzüng tsütsü ajangzükdaksür.

Nagaland state-i horticultural crops asem- Naga Mircha, Naga Tree Tomato aser Naga Sweet Cucumber atema G.I registration nguogo.

Department of Horticulture-i FPCs 13 tentetogo aser Organic Certification kübok ali 6800 Ha tashi aniokogo.

Horticulture Department-i Nagaland nung mozü mamshii

Pineapple, Kiwi aser Large Cardamom tsünütetba atema National level nung konang tetushi nguogo.

Horticulture Department-i Nagaland nung vegetable villages 100 shimtetogo aser iba nung kilen 10,000 shi lir. Department-isa entrepreneurs aser shishilembartem asoshi air cargo services tenzüktsüogo aser tanga state tem den Naga Organic Pineapple o Organic Kiwi ama süngjangtem atema market linkages yanglutsüogo.

Nagaland nung Kiwi, Dragon Fruit, Avocado aser Persimmon amala süngjangtem tsünütsü lenmang sadema lir. Department-isa 'Horticulture Model Village' inyakyim tenzükogo aser yimtsüng 16 nung One Crop One Village mapa tenzüka inyaker.

Congress-i training & research centre ka lapoktsü

New Delhi, July 10, 2024 (Agencies): Rahul Gandhi-i küm aika BJP-RSS anema rarayonga aruba nung pai Hinduism aser Hindutva tsüngda tebandang aliba indang jembia arur.

Rahul-isa lisopurtem dang vanvasi ta masü "adivasi" ta ajatsü shia arur. Congress-i item tangatetba par züngsemtem nem tali tejangjaba nung metetdaksütsü atema Kerala nung training & research centre ka lapoktsü.

Iba centre ya linük ajungalen nungi Congress züngsemtem atema lir aser Director inyaktü atema Ministry of Panchayati Raj nung taoba senior consultant P.P. Balan shimogo.

July 20, 2024 nü Thiruvananthapuram nung centre madak ketdangtsütsü mapa agizüktsü akok ta Balan-i osangbener dang ashi.

September 2013 nung Sonia Gandhi-i Thiruvananthapuram nung Rajiv Gandhi Institute of Developmental Studies (RGIDS) lapokja liasü aser iba nung training and research centre amenoktsü ta Balan-isa ashi.

Rahul Gandhi-i Congress asentenshitsu atema tangatetba tejangja ayutsüba kanga

tongtipang ta ashir. Mapang kabo pai Congress lennirtem asoshi ibala training sessions nung agütsü shidanga liasü.

2022 küm Udaipur Chintan Shivir nung Congress senden amendang Rahul-i "regional party temi BJP madak takok mangutsü kechiyong parnok tangatetba nung anünga lir" ta shia liasü.

"Iba tongpang ya regional party kati raratsü makok kechiyong iba ya ideology indang rara ka lir. Ni RSS aser BJP indang ideology anema rarar kechiyong iba ya asen linük atema lendong lir. Parnoki tesempatep prokshiba aser ozüng alema inyaksangshiba anema ni raratsü aser raranür. Iba ya küm taküm asoshi rara ka lir" ta Rahul-i ashi.

Rahul-i mapang talangka Congress züngsemtem nem party tamendakdak indang angatetsü atema training agütsütsü nungdakba jembia arur.

February 2019 nung Rahul-i Congress president inyaktang pa den tesentaktep tajung aliba Sachin Rao nem Congress training department aser magazine Sandesh atema in-charge agüja liasü.

"Onoki sentong kar agir aser

iba nung anogo 30 nü leadership development programme dena lir. Sentong karbo state sasep nung agir" ta Sachin Rao-i ashi.

"Onoki vision document ka renemer aser iba sülen training modules aser curriculum yanglutsü. Iba sentong ya Congress züngsemtem atema dang masü saka lennirtem atema capacity building ama asütsü aser training calendar ka yangludar" ta P.P. Balan-i ashi.

"Iba atema curriculum ka yangludar aser iba nung Rahul-i teti tesempatep den raratsü atema "mohabbat ki dukaan" aser Constitution of India ya len aniba tesangwa ta jembiba densemstsü" ta paisa ashi.

Iba centre nung training sessions agiba dang masü saka research mapa inyaktü. Onoki government schemes balala asadangtsü aser tajungba akümtsü atema shisalen agütsütsü, ta Balan-isa ashi.

"RGIDS ya Neyyar Dam ayongküm nung yanglua lir. Congress Kerala unit-i 40,000 square feet building ya anepalua repranger aser tang iba ya Congress training wing indang national nerve centre asütsü" ta paisa metetdaksü.

NIELIT Kohima nung Digital Forensics Training Program tenzük



National Institute of Electronics & Information Technology (NIELIT) Kohima, Government of India ajanga Egypt nungi kaketshir, university lecturers/professors aser sorkar ketdangsürtem asoshi Digital Forensics Training Program ka July 8, 2024 nü tenzükua liasü.

Dimapur, Chiteni/July 10 (TYO): Alizüng tasen ka tongteta National Institute of Electronics & Information Technology (NIELIT) Kohima, Government of India ajanga Egypt nungi kaketshir, university lecturers/professors aser sorkar ketdangsürtem asoshi Digital Forensics Training Program ka July 8, 2024 nü tenzükua liasü.

Iba sentong ya ajanga NIELIT Kohima-i cyber security defences tashi itshitsü atema meranga inyakba, national digital security ulushitsü Government of India indang mangdang den lirumedema inyakba sayur.

2010 küm amenokba NIELIT Kohima nungya facility

tasen aser mongintem aliba advanced digital forensics lab lir.

Digital forensics aser cyber security tajungba kumdaktsütsü asoshi parnoki bendanga agütsür inyakba ya parnoki training sentong tajung ayongzükba aser forensic analysis services agütsüba, cyber-crimes balala bentetsü atema Nagaland aser danga northeastern state tem nung police yariba ajanga sayur.

Iba mera tasenba yagi iba tsütsülen mera tasen ka agiba sayur aser NIELIT aser MeitY, Government of India kübok international students nem training agütsür.

Iba program tenzükba

sentong nung Ambassador of Egypt in India, Wael Mohamed Awad Hamed; Charge d'affaires & Deputy Chief of Mission, Cairo, Egypt, Asheesh Gupta; Secretary, MeitY, S. Krishnan; DG, NIELIT, Dr. Madan Mohan Tripathi; Director, ITI Egypt, Dr. Heba Saleh; Director of International Relations, Egyptian Ministry of Communications and IT, Samah Aziz aser linük anaprong nungi ketdangsürtem dena liasü.

Hopta ter online training module agiba sülen shilem agirtemi NIELIT Kohima semdangtsü maongka angutsü aser cyber security skills angazüktsü.

Chozuba nung ak-an tajungba nung metsütsü training agütsür

Dimapur, Chiteni/July 10 (TYO): Department of Animal Husbandry & Veterinary Services ajanga Phek district kübok Chozuba nung tetsürtem asoshi anogo pezü atema Improved Piggery and Poultry Farming training ka July 10, 2024 nü tenzükogo.

Iba training ayongzükba

nükjidong Dr. Pusazono Chusi, Deputy Director, Assistant Sector Officer, Women Welfare Development, AH & Vet Services, Nagaland ajanga rateta ashi aser Dr. Rosou Pohena, VAS, Pfutsero ajanga 'Women Empowerment through improved Piggery & Poultry Farming' onük nungi jembia liasü.

Iba sentong nung Deputy Chief Veterinary Officer & i/c CVO Phek, Dr. Esther Krocha menden liasü aser Dr. Khrusato Keyho, Farm Manager, CBF Phek ajanga melepzüng o jembi.

Iba sentong ya National Commission for Women, New Delhi ajanga sponsor asüba alitsü.

St. Joseph University nung BPES tenzükogo



Advisor to Chief Minister, Abu Metha den tongtipang nisungtem aser St. Joseph University nung BPES mezüng batch pur July 10, 2024 nü külemi tangokba noksa ka yangi angur.

Dimapur, Chiteni/July 10 (TYO): St. Joseph University nung Under Graduate kaketshir tasentem aniokba aser Bachelor of Physical Education (BPES) semzükba sentong ka SJU Auditorium, Chümoukedima nung July 10, 2024 nü agia liasü.

Timtem balala ajangeta iba alizüng tongtetba atema, iba sentong nung tesemdang tongti Advisor to Chief Minister & Ambassador, St. Joseph palliative care, Nagaland, Abu Metha-i pelaba lemsatapa liasü.

Saisapong nung physical education atema course ka agütsütetba ya Nagaland nung ibai kaketshir mezüngbuba alitsü, koba kaketshir atema

dang masü saka Nagaland ajanga asoshi tongtipang anogo ka lir, ta pai ashi.

Iba yagi Nagaland atema dang masü saka tarutsü putu nunga linük asoshi otsü aika zülutsü.

Iba course tenzüktsü atema Bishop of Kohima-i mapang telatet makai meranga inyakba asoshi Metha-i pelaba ashi.

Iba ama kaketshir reju ka nung azüngtsü maongka anguba ya temoatsü lir, ta pai kaketshir dang ashi aser iba maongka amshia shisatsü bushitsü ayongzükua liasü.

International sports industry jenjang ya Asian dollar 500 lir aser Indian sports industry ya

2027 küm 100 billion dollars jenjang akumtsü, India ya alima nung saisapong tsütsü takartiba linüktem rongnung tematiba jenjang nung lir aser saisapong tsütsü tashi tait akumba mapang lir, ta pai Abu Metha-i ashi.

Alima nung saisapong ya tekeratiba ainba industry ka lir. Nisungtemi alima nung meimchir inyaksangshi balala reprangba rongnung saisapong ya tematiba lir, saisapong ajanga linük timba tawabangba ka küboki aitdaktür. Saisapong nung mangdang ya tatem maka, ta ashi.

Iba industry nung inyakyim balala nung takotet nüngdaker. Ibai asayar mesüra coach ka

NSLSA ajanga nisung 17 nem victim compensation agütsü

Dimapur, Chiteni/July 10 (TYO): Nagaland State Legal Services Authority (NSLSA) ajanga Nagaland Victim Compensation Scheme, 2012 aser National Legal Services Authority (NALSA) Compensation Scheme for Women Victims/Survivors of Sexual Assault/other Crimes-2018 kübok financial year April 2023-March 2024 atema nisung 17 nem victim compensation sen 36,85,000 agüja liasü.

Iba sen ya Home Department, Relief & Rehabilitation, Government of Nagaland ajanga sanction asü aser District Legal Services Authority balala nungi applicants 17 nem agüja liasü.

Item compensation ya District Legal Services Authorities (DLSAs) aser NSLSA ajanga recommend asü aser sen sanction asütsü atema State Home Department, Government of Nagaland (Relief & Rehabilitation) dangi yoka liasü.

Applications nungya POCSO Act kübok tashiyim amshia shi nung medemba (rape), Sexual Assault & Loss of Life aser danga mapa

tamajung nung nisung takum samaba indang ken o tem dena lir. Iba teyari sen ya tetsür chanu (minor) 14, tebur chanu ka aser tebur ana liasü.

Victim compensation ya Nagaland Victim Compensation Scheme, 2012 aser National Legal Services Authority (NALSA) Compensation Scheme for Women Victims/Survivors of Sexual Assault/other Crimes- 2018 densema scheme ana kübok agüja liasü.

Mapa tamajung inyakba mapang takum samaba kinunger mesüra yirur alir nem senotsü teyari agütsütsü atema Victim Compensation Scheme ya tenzük.

Nüburtemi iba atema applications ya state indang Legal Services Authority ajanga FIR, medical reports aser judgement mesüra recommendation (ken o tembanger lira) copy dener agütsütettsü.

Ken o asadanga sülen compensation ya mapa tamajung inyakba, takum samaba, asürtem asoshi arishi küm, monthly income, number of dependents amala asadanger agütsür.

NPF Mokokchung Division ajanga tenüngsang agütsür

Dimapur, Chiteni/July 10 (TYO): Nagaland state indang ULB election nung toktepa candidates ajanga nem akhum agütsür aser takok angur aser talisa Phek Town Council indang Chairman Shevehu Nienu aser par team aser Bhandari Town Council nung Chairman Khonthungia Odyuo aser par team nem tenüngsang agütsür, ta NPF Mokokchung Division aser Press secretary Imtisungkum nati sangdong sangdong ka ajanga ashi.

Nenoki party meimba aser bendanga agütsür inyakba atema akhum agütsür. Ano NPFLP lenir MLA Kuzholuzo Azo Nienu aser Secretary General Achembemo Kikon na lenisüba kübok NPF ajanga takok tulu ngutetba asoshia konang tetushi agütsür, ta NPF Mokokchung Division tir Tangit Imsong aser Press secretary Imtisungkum nati sangdong ajanga ashi.

akumba indang kisüng masü, saisapong nung Media & broadcasting, sports administration, event management, personality management amala lenla balala nung takotet akumtsü nüngdaker.

Nagaland ya saisapong aser lanurtem asoshi tesep ka akumtsü asünungbo, iba course nung mezüng graduate asürtemi iba mangdang tenzüktsütsü aser Nagaland aser India champions atema nenok tetenzük asütsü. Tanü Nagaland ya linük nung dang masü saka international sapang nung shilem agütsü mangdang lir aser ibaji nenok nungi tenzüktsü, ta Abu Metha-i kaketshirtem ayongzük.

Iba course tenzüktsü asoshi SJU aser catholic nungtemi kanga kera awaloka aoba atema pai tenüngsang agüja liasü.

Pai Nagaland nung aliba lanurtem dang takok angutsü atema temulung ulutsü aser tasü aittsü ajungshi aser nisung mashi kati tesem mashi nungi takok nguteter ta teti temulung

nung ayutsü ashi.

Meranga inyaker temi takok angur aser tanü nungi tenzükua iba classroom nungi lenir, nokinketer, champions tem adoka alima dang Naga nung ama Nagaland indang otsü tasen ashitsü imlaa atar, ta ashi.

Paisa kaketshirtem dang bendanga agütsür meranga inyakba mapang tamakoktsü ya indang mejembitsü aser mangdang yur University indang kisüng masü saka Nagaland atema ambassador tajung akumtsü ayongzükua liasü.

Iba sentong nung Registrar, SJU, Dr. A Robert Xavier-i pela agizükba o jembi aser Vice Chancellor, SJU, Dr. D. Gnanadurai-i tir o jembi.

Bishop of Kohima, Pro-Chancellor, SJU, Most Rev. Dr. James Thoppil-i tayongzükba o jembia University indang documentary ka sayu, Music Club ajanga sobaliba ken ka aten aser Dean of Students Affairs, SJU, Prof. Charles Mhonthung Ezung-i melepzüng o jembia liasü.

Rajasthan nung mapa lakh 4 adokdaksütsü: Dy. CM Diya Kumari UP nung tzünglu dak sendakba lendong balala nung nisung 10 asü



July 10, 2024 nü Jaipur nung state legislative senden nung Rajasthan Deputy Chief minister aser Finance Minister, Diya Kumari-i budget benokdang tangokba noksa nung angur. Kasa noksa nung Rajasthan Chief Minister, Bhajan Lal Sharma-a angur.

Jaipur, July 10 (Agencies): Bodhbarnü Rajasthan nung Deputy Chief Minister aser Finance ministry-a repsema abenla, Diya Kumari-i, 2024-25 kümsük atema state budget benokogo.

Tzü supply, rongsenkettzüng aintsü, infrastructure terenlok aser lanurtem nem tashi agütsütsü onüktem nung rangloker budget renema liasü.

State legislative assembly nung budget benokdang Diya Kumari-i taoba mapang US Tir, Theodore Roosevelt-i jembiba o lephsia, "Asenok ajak junga alitsüsa asenoki meinyak tashi iba linük ya teti atema tesem tajung ka masütsü," ta metetdaksü.

Tamalen (February 8) Kumari-i assembly nung Vote on Account (Interim Budget) benoka liasü.

Bodhbarnü Kumari-isa, Rajasthan rongsenkettzüng dollar sen billion 350 akümtsü

nükjidong densema bangzüng ter ajanga sorkar nükjidong balala ataloktsü metetdaksü.

State nung mapa menungi aliba lanurtem atema taruba küm 5 tsüngda mapa lakh 4 adokdaksütsü, ta lai metetdaksü.

Budget nungi shilem 8 bo health sector atema lemkütsü.

Kumari-i health sector atema sen crore 27,000 aser Jal Jeevan Mission (JJM) kübok project trok asoshi sen crore 20,370 lemkütsü, aser ibaji ajanga yim 5,846 tajangzük angutsü.

Kumari-isa, state nung Greenfield expressways 9 yanglutsü aser ajakji senteper kilometer 2,750 asütsü aser Detailed Project Report renemba nung sen crore 30 indoktsü, ta metetdaksü.

Taruba küm ana tsüngda Lok Parivahan Sewa kübok electric light mesangoka maliba ki 2,08,000 nung light

villages amenoktsü, ta deputy chief minister, Kumari-isa metetdaksü.

Gari lenmang projects tesen nung sen crore 60,000 indoktsü aser gari lenmang yanglushiba, railway apu yanglushiba aser flyover yanglushiba nung sen crore 9,000 indoktsü, ta lai ashi.

Taoba mapang Ashok Gehlot-i aniba Congress sorkar aija Kumari-i, Rajasthan sorkari question paper leak asüba nokdangtsü atema mera agia inyakogo aser tang tashi nung aibelener nisung 100 dak tema puogo, ta metetdaksü.

New Delhi, Chiteni/July 10 (Agencies): Bodhbarnü Delhi aser national capital region (NCR) nung tzünglu kanga sashia aru aser Himachal Pradesh nunga tesem kar nung tzünglu sashia aruba ajanga gari lenmang 28 shibanga liasü.

Hombar nungi tenzuka Uttar Pradesh nung tzünglu aser tzümetsüng dak sendakba lendong balala nung nisung ter süogo. UP nung ayong aika nung tzü tali metsümbanga ayimba agi ketdangsertemi tzütepding (dam) aika lapoktsüsa aküm.

India Meteorological Department (IMD)-i ashiba agi, Delhi nung maximum temperature 31.6 degrees Celsius liasü. Osangbenertem den jembidang Uttar Pradesh nung State Relief Commissioner, GS Naveen Kumar-i, Pilibhit district kübok Dhaka Chant yim nungbo helicopter amshia tzümetsüng lendong nungi nisung tenet kümzuka liasü, ta metetdaksü.

Nepal nungi Sharda ayong nung tzü cusecs lakh 4 chiocka ajanga Uttar Pradesh nung aliba ayong aika nung tzü mobanga ayim. State kübok Balrampur, Shravasati, Kushinagar, Pilibhit, Siddharthnagar aser

Lakhimpur Kheri district tem nung tzümetsüng lir.

Bodhbarnü Uttar Pradesh Chief Minister, Yogi Adityanath-i helicopter nungi Pilibhit district kübok tzümetsüng agi kongshiba tesemtem asadanga liasü.

Relief Commissioner-i, Budaun nung aliba Ganga ayong nung tzü lendongbang nung yimdar, Balrampur nung aliba Rapti ayong, Paliakalan nung aliba Sharda ayong aser Lakhimpur Kheri nung aliba Shardanagar ayongtem nunga tzü tali mobanga yimdar, ta metetdaksü.

UP kübok Pilibhit aser Shrivasti na nung nisung anana, Balrampur, Kannauj aser Pratapgarh nung nisung kaka asü aser Kaushami nung tetsür ana densema nisung asem asü.

Mumbai nunga tzünglu sashia aruba ajanga railways services kar anena liasü aser Maharashtra tesem kar nungbo menoknok-a anak.

State Legislative assembly nung jembidang Deputy Chief Minister Ajit Pawar-i, anepdang 7:14 ako nung Hingoli, Parbhani, Beed, Jalna, Nanded, Chhatrapati Sambhajnagar districts tem nung 4.5 magnitude nung menoknok anak, ta metetdakja liasü.

Uttarakhand aser WB nung assembly by election agidang rara adok

New Delhi, July 10 (Agencies): Bodhbarnep 7:00 ako nungi state tenet kübok assembly constituency 13 nung by election agi tenzuka liasü aser nikongdang 6:00 ako nung tembangogo; Uttarakhand aser West Bengal na nung tesem kar nungbo rara adoka liasü.

Lok Sabha election sülen tang mezüng state tenet nung assembly by elections agiogo. Tanü iba election nung tokteper candidate tem rongnung Himachal Pradesh Chief Minister Sukhvinder Singh

Sukhu kinüngtsü, Kamlesh Thakur-a densema liasü.

By election agiba state temji Bihar, Himachal Pradesh, Madhya Pradesh, Punjab, Tamil Nadu, Uttarakhand aser West Bengal state tem liasü.

Uttarakhand aser West Bengal na dak alaka tanüngba state tem nungbo election süngjema agitotogo. Uttarakhand kübok Manglaur constituency nung rara adoka party balala pusemer nisung pezü yirua liasü aser polling booth kar nungbo injanga khadok.

West Bengal nung Bagdah aser Ranaghat Dakshin na nunga rara adoka liasü. BJP-i, TMC züngsemtemi BJP nungi polling agents anema inyakba den külemi party candidate tem polling stations-i marudaktsü, ta tai tongloksü.

BJP candidates- Manoj Kumar Biswas aser Binay Kumar Biswas nungeri, polling booths semdangtsü atema parnok nem temelaba magütsü, ta metetdakja liasü.

BJP-isa TMC anema Election Commission nem ken o agütsüogo.

Bank of Baroda
PURANA BAZAR BRANCH
 N H 39, Kohima Road, Purana Bazar, Dimapur, Nagaland- 797112
 Email: vjdipu@bankofbaroda.com

KIOJEN AGIADOKBA (For Immovable Property only)
 Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 3 nung agüja aliba tashi nung ajemdaker tsünglanglen sign süa aliba **Bank of Baroda Authorised Officer-i 14.09.2023** anogo nung Demand Notice ka ajanga sen apur **M/s. Yepthomi Enterprises, Proprietor Mrs. Temsumongla Imchen** dang notice nung shia aliba ama **Rs.18,97,910.60 (Rupees Eighteen Lakhs Ninety Seven Thousand Nine Hundred Ten and Sixty Paise only)** den Unapplied Interest aser tanga Charges agüjang ta tuyua liasü.

Ajisüaka sen apuri senji magütsütet nung sen apur aser nürburtem dang tsünglanglen sign süa aliri iba Act kübok Section 13 den sub section (4) aser Security Interest (Enforcement) Rules, 2002 nung Rule 8 nung agüja aliba tashi amshia **2024 küm July 9** anogo nung tsünglanglen shia aliba kiojen agiadokogo, ta sangdonger.

Talisa sen apur aser nürburtem dang iba kiojen dak sendakba nung kecha inyakshangshi masütsü metetdaksür aser kari danga tetuyuba anema inyakra Bank of Baroda-i **Rs.18,97,910.60 (Rupees Eighteen Lakhs Ninety Seven Thousand Nine Hundred Ten and Sixty Paise only)** den Unapplied Interest aser tanga Charges meshitsü.

Sen apur dang iba Act nung Section 13 kübok sub-section (8) nung aliba ama mapang shidak nung item kiojen alangzüksü atema inyaktsü metetdaksür.

Kiojen osang tejangja:
 PWD Colony Dimapur, Nagaland nung Mr. Bendangsashi Imchen tenüng nung aliba Flat No. Patta No. 837, Dag No. 950, Block No. 9 of Dimapur Mouza No. 2, Area 00B-00K-19L aser yangjii aliba kiojen ajak.

Bounded:
North tsütsülen: Mapulemba'er li aser lenmang, **South tsütsülen:** Imtongjungba'er li, **East tsütsülen:** Mapulemba'er li aser lenmang, **West tsütsülen:** Mapulemba'er li.

Date: 09.07.2024
 Place: Dimapur
 Nenei Hangshing
 Authorised Officer, Bank of Baroda



July 10, 2024 nü Vienna, Austria nung Ato kilonser Narendra Modi aser India Foreign Minister S Jaishankar nati Austria Chancellor, Karl Nehammer (noksa nungbo mangur) aser tangar ketdangsertem den senden amendang tangokba noksa nung angur.



TIR YIMYIM YIMOBILEM (EDITORIAL)

DIMAPUR YANGTEPNÜ, JULY (CHITENI) 11, 2024

Modi o Putin na

Narendra Modi linük nung tang agi ashia-ashia tasembuba ato kilonser akümba sülen mezüng among adena oagi Russia yimtiba Moscow nung tetsüng ajemogo. Pai tamalena 2019 kuma Russia semdangogo saka tang semdangba yabo balaka alima kintem ajaki kanga nükpetsa reprangtsüsa mapang ka nung semdang asütsü. Aji oda, külen Russia-i Ukraine temakdak aser ano külen Washington nung Russia anemer telok NATO senden telidak nung India ato kilonseri yimmaker tetsütiba tonga oagi ajurutepa tesendaktep yanglushiba mapa jagi Russia anemer linüktemibo kanga mepelai bilemer. Iba jagi, Ukraine tir Volodymyr Zelensky-ibo kecha temulung nung rema meyui, alima nung democratic lima tulutiba kati alima nung nisung tepseter tamajungtiba dak azülokba mapaji kanga tejashitsü aser yimjung mapa anema teraksa tulu agütsür asütsü ta metetdaksü. Atangji, Modi-i par lima amaksang dak oa azüloka salemtepba mapaji Zelensky asoshibo magizüktetba mapa ka lir. Ajisuaka, India asoshi maparen aika nung Russia-ji sentoktsü makokba tongtibangba kin ka lir, anungji tangar European lima aser US den tamajung tulu tentepba Ukraine amakba mapang nunga, tangar limatem ajak yutsür, aritepa Russia-ang semdangtsü apusoba mapa nungji India-i Russia den jembinüba rongdak nungdak o aika keta alitsü. India-i Russia teyari agiba tongtibang kaji raraba osettem la dang alir aser anünglak nung senzüba sentongtem nunga Russia-i yarir. Ibaji dang masü saka tang ya Russia aser China na külen ser Ukraine dak aketba ken o nung tangar alima kintem den tokteper. Iba ama mapang ka nung Russia, China aser Pakistan longjemer India anema mapusodaktsütsüsa inyaksüsbaji India atema kanga rongdak aser tekümdangtsü mapa ka lir. Item ajakji bilema nokdangtsü atema India ato kilonseri Russia tir ajurur asütsü. Atangji, Russia asoshi India ya tongtibang linük ka lir, kechiyong India-i la dang nungi raraba osettem dang masü saka totzü dena alir aser India nung karbo Ukraine anema Russia nung den tongpang nung nokdaka lir. Ibaji dang masü saka tanü putu nung India ya alima kintem rongnung tongtibang kin ka kumogo, anungji la ya kin ajaki nungdakba aser akümstübuba kin ka lir, anungji Russia aser Ukraine na tsüngda yimjung yangluba mapa nung India-ia tiyongtsüi ia shilem tuluka agitettsü. Iba tashiji meteta India ato kilonseri Russia aser NATO nung dena aliba kintem dang yimjung lenmang tajung ka pipoka sayutet nungbo, iba jagi alima tsüngdang India akhüm tuluba akümstü. Atangji, India ato kilonser Russia atongba anogo nungang nunga ta Russia-i Ukraine yimtiba Kyiv nung tanurtem mozü ki ka nung dena bomb pokloktsüba agi tanur dena nisung 41pokseta südaktsüba mapa jagibo Russia-i alima kintem telongjem UN pangzüng ozüng anema inyakba dang masü saka India dena mezüngmeshir amai bilemstüsa atalokogo. Ajisuaka, bomb teyokdak aser nisung tetepsetdak nung yimjung yanglutsüsbajibo tamakoktsü ta India ato kilonseri Russia tir dang ashiba o ji Russia aser Ukraine na tsüngda Indiai yimjung yanglutsünüba olen ka asütsü. Tang tashi nung Russia-i Ukraine amakba ya India-i aijaa mali aser metentsüa mali, saka aiben alima kintem telongjem senden nung Russia mapa aitsütsü bangjemdang India-ibo madener. Tetezü, India-ji Russia tsütsü talangbalen oa dena lir ta sayur. Atangji, India asoshi Russia aitsütsüsbaji tasak, kechiyong idakji metetmeteta India akoksatsüsa mapa aika lir saka ano Russia metenja Ukraine anemstüa makok, kechiyong ano mapa aika nung Russia dang nungibo US, Israel aser European kintemang India asoshi tenüngdakba. Iba ama temejep mapang ka nung India-i ochi jembia alima kintem tsüngda yimjung yanglur akümstüsbaji tensa mapangi akanger. Iba rara mapang ya shitakba nungbo alima kintem rongnung Russia o Ukraine na ta masü aser Russia o NATO na tsüngdaa masü saka India o China na tsüngda tashi sayuteper amai kumogo.

OLEMSABANG

TANÜ ASEN LOKTILIBA NUNG AJURUBA TEBILEMSTÜTEM

~ L.Kika Pongener.

Tanü asen loktiliba ajak nung tebilemstü aika ajurur. Aiben loktiliba nung telongjem aser yimjung raksatsüsa tebilemstü aika ajurur. Aji oda, item tebilemstütem ya kong nungi kodaser adoker (?)...ta tera-ji jungjunga bushidangra, nisung o nisung na tsüngda kati ka arishitepba, kati ka tajung mereprangnui tenukmeremba, kati ka jenjang junga aliba mereprangnui jungnatsütsü merangba, kati ka temaba menden nung mena aliba attsüzüktsü merangba, lokti lennisuba nung tanishir menden raktepba aser yimsusuba bangdak menden nung amentsü raktepba, yamala agi lokti nung aiben tebilemstü ya adoker. Ano iba dak alaka, ozü, par, onok, parnok, ozü telok, par telok, ozü party, par party etc. ta telok-telok lemsaba agi lokti longjema aliba raksatsüsa tebilemstü aiben adoker. Ano Tsüngremi nisung shia nem sempet balala lemsüktsü, kar lennir asütsü, kar kenshi-oshir, kar o tsüngro songa jembitsü, kar shisatsü tarok, kar tanitaker asütsü... Ajisuaka, nisung kari pa/la nem melemsüktsüba sempet, pur-medemer, külemi tenzüker aser adianu kar dak keta aliba aji tenukmerema arishiba, ano pur-medemer aser adianu kar loktiliba nung nuburi keta sena junga tenzüka aliba, aji tenukmerema atsüngdoktsü merangba, ano pur-medemer, külem lisemer, yimtsür-yimer kar jenjang junga aliba aji raksatsütsü merangba, iba amala külittem agi loktiliba nung mepetmesu aser tebilemstü ya teimba adoker.

Asen mimchir aika dak aketba tashimait kaji, lokti maparen aser sentong ajak nung, aikati lokti ajangzüktsüba nung rangloker masü, saka pei ajung asaa, pei mulongba tang agitsü ta tekong merangba, pei tang kibur asütsü merangba, pei kinunger, adianu, sosem, pei jungteper apia shimtsü merangba, aser nisung rongnung tanak-temesung bendanga benshiba, iba amala shisatsü agi, lokti nung nubur tsüngda telongjem, temeimtep aser tesendaktep raksatsür. Ano lokti nung teraksa adokdaksüba küli kaji, nijaren nung kati ka majinutepepi tsükchitepba agi, lokti ken o kümdaktsür, lokti raksatsü merangba, iba amala jagi lokti nung aiben mepetmesu adoker. Ano kidong o kidong tsüngda meputepba, kin o kin tsüngda meputepba, telok-telok, Party-Party tsüngda meputepba agi yimden aser lokti ken o kümdaktsüba, iba amala küli ajanga lokti nung telongjem raksatsür. Alima asünungji, nijaren nunga suang, telok-telok tsüngda nunga suang, kati ka majinutepeba aser tsükchitepbaji alima mesama tashi odang alitsü, saka ibajagi lokti ken o kümdaktsür yimden, arogo, loktiliba longjema aser sunepa aliba raksatsü shinga-ia memerangtsüla. Aji oda, nisung o nisung na tsüngda meputepba aser tsükchitepbaji alima mesama tashi alitsü, saka lokti-jibo indang-indanga ochi nung rangloker anitsüla.

Lokti nung lennir dak tulu-tila, takar-sensaker, tanak-temesung bendanga benshiba (Partiality) shisatsü malitsüla. Lokti nung lennir dak ozü kidong, ozü mepu, ozü yimer, ozü tsükong, ozü kin...ta bendanga benshiba (Ism) shisatsü malitsüla. Ano lokti nung mepetmesu adokdaksüba küli kaji, lokti-i tashi aser teinyaktsü lateta yutsüba dak alia, lennirtemi tashi talila amshiba agi aiben mepetmesu adoker. Ano loktiliba rajang kümdaktsüba tera tamajung kaji, lennirtemi lokti ajungtsü apia masü, saka pei sunutsü asütsüba apia, pai/lai ashiba nung tashi angaa anidaktsüpur dang tenzüker shimba iba ama tentet ya kanga majung. Ano lokti nung lennir karibo lokti anitsü temzüng-ozüng lateta ayuba küpok melitet, pei mulongba ama dang anitsü merangba-a karbo lir. Lokti ajak nung nubur liromedema anitsü atema temzüng/inyakyim lateta ayur...Lokti nung lennir kaji lokti dangji pa/la-ji temaba masü, saka lokti-i lateta ayuba temzüng/inyakyim nungji pai/lai tashi anga-a anidaktsüla. Lokti ka anitsü temzüng/inyakyimji lokti teimbai mulongba nung lateta ayur...Aji oda, iba temzüng/inyakyim nungji lennir kari tashi anga-a manidaktetra, iba lennirji kechi komaka shia-metet-aka, lennir tajung masü aser lokti asoshi menungdakba lennir asütsü. Anungji lennir ajaki angatetsüsbaji, asen mechi lokti ka petsa-prongdaktsüra... Tsüngrem tsüngdang aser nubur tsüngdang khuret aser sentsüh tulu asütsü.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Israel sepaitemi Gaza nung Arogoi lapokba hospital shibangtsü



Gaza City nung Arogoi lapokba Al-Ahli Arab Anglican hospital nungi shirangertem aser parnok kinüngertem aienshidang taongokba noksa nung angur.

July 10, 2024: Israel sepaitemi Gaza yimti nung Arogo indang Al-Ahli Arab Anglican Hospital shibangtsü tuyuba sülen iba hospital nungi shirangertem aienshiogo.

Israel sepaitem tetuyuba anema Yirusalem nung aliba Anglican & Episcopal Church-i Israel sashia aitsüogo.

Israel sepaitemi Gaza Strip kübok district aika nungi nisungtem aienshitsu tuyuba den külemi Al-Ahli Arab Anglican Hospital-a shibangtsü tuyu.

Episcopal Diocese of Jerusalem-i sangdong ka ajanga, "Israel sepaitem tetuyuba ajanga iba hospital shibangtsüsa kümogo," ta metetdaksü.

Amongnü nikongdang drones ajanga iba hospital aliba kiyong maaka liasü.

"Iba tatalokba sülen Israel Defense Force (Israel

sepaitem)-i sangdong ka ajanga, iba area ya 'red zone' ta sangdonga hospital nung alirtem densema iba kiyong nung alir ajak dang pei ki toktsür aienshitsu tuyuogo," ta Arogoi metetdaksü.

Archbishop of Canterbury, Justin Welby-ia Arogo hospital shibangtsü tuyuba aja, "iba tetuyuba ya ajanga yirua alirtem aser shirangertem lendong tulubai yoker' ta metetdaksü.

Jerusalem nung aliba St George's College nung Dean, Richard Sewell-i, "Gaza nung onok ministry mapaji hospital ka lir. Rara mapang nung ajaki medical teyari nüngdaker," ta ashi.

Osangbener den jembidang Israeli sepaitemibo, "Gaza yimti nung alirtem dang lendong nungi jenbutsü atema iba tesem tokjang ta tuyuogo saka

Palestinian health officials aser bendangertem dangbo iba tesem nung aliba hospital balala nungi nisung aienshitsu menügdak ta shiogo," ta metetdaksü.

Israel sepaitem tetuyuba kübok Palestine nunger aser Gaza yimti anüdoklen tsütsülen nungi nisng meyrjang aika aeinshigo.

Diocese of Jerusalem nung Archbishop, Hosam Naoum-i, "Onok meyong hospital shibangtsü tuyubaji onoki sashia aitsür. Rara mapang nung aser timtem mapang nung yirua alirtem yaritsu atema emergency healthcare services nüngdak," ta metetdaksü.

Archbishop Naoum-isa Israel dang iba hospital lapoktsü temelaba agüjang aser tangsa rara anentsü atema telok ajaki telemtetba agiang, ta mepishia metetdaksü.

Odisha state nung aliba yim ka nungi Khristan kibong 7 meindok

July 10, 2024: Odisha state kübok arem agi meketa aliba yim ka nungi Khristan kibong tenet meindokogo; tribal yimsü amangertem jagi Khristan yimsü agizükba agi parnok yimdak nungi meindok, ta International Christian Concern (ICC)-i metetdaksü.

Tribal village council-i meindokba ajanga tzungluruwa mongpu nung Khristantemji arem nung tejenokdak aser chiyungtsü agi anünga kanga timtemdar.

Iba tatalokba ya June ita nung liasü, ajisüaka tang ang iba osang ya jungkai adoker, kechiyong iba yimji Malkangiri district kübok kanga tezülen aliba arem ka nung lir.

Iba osang angashiba sülen Khristantem aser pastor temi item kibong tenet nemji teyari terabo agütsüogo. Item kibong nungi züngsem kati phone ajanga video tatsüka

mangaokba sülen social media nung lemsatapa liasü.

Video nungji Khristantem rongnung kati, küm pongu tejaklen par kibong ajaki Khristan yimsü agizükba mapang nungi tenzüka yimdak tribal yimsü amangertem parnok amokmerena tribal yimsü dangi tanaben meyipang ta rongshia aru, ta lemsatapa lir.

Paisa, par kibong den külemi tanügba kibong züngsemtem lendong nung lir, kechiyong parnoki Khrista agizük, ta shia parnok atema sarasademjang ta mepishi.

Taküm June ita nung yimdaklirtem jagi Khristan kibong tenet nungjagi züngsemtem dak azükba sülen kidang nungi osetsüset ajak agizüka raksatsü.

Yimdaklirtem jagisa Khristantem dang nenok yimdaki tanaben arura

tepsettsü, ta amokmeren, ta paisa metetdaksü.

International Christian Concern (ICC) den jembidang Pastor Digal-i, Khristantem yimdak nungi meindokba osang angashiba sülen parnoki iba osangji local police nem metetdaksü saka police-i kecha meinyak, ta ashi.

Iba sülen parnoki district superintendent of police nem metetdaksüba sülen ang police-i mera agia bushisügang tenzüko.

Pastor Digal-isa, Hindu yimsü alia amangertem tribal yimsü amanger village council dang Khristan kibongtemji meindoktsü ajungshia liasü, ta metetdaksü.

Pastor-isa, tawa state nung BJP sorkar amenokogo, anungji state nung Khristantem ano timtem kanga bulua ajangshitsüa akok, ta metetdaksü.

ANOGO ABEN TSÜNGREM DEN

Yimjung masü saka nok.
Mt. 10:34 - 39

LK. 12.51 - 53 : Kechiaser ki ka nung pungu alibaji lemsatsütsü, asemi ana anema, anati asem anema telemsa adokdaksütsü. Tebui techir anema, techiri tebu anema, tetsüi jala anema, jalai tetsü anema ajak meputepi nenok rongnung telemsa adoktsü. Shibai pei tebu aser tetsü kü dang tali meimdir paji ni atema metemsü.

Iba O tanü asen Khristantem dak atalokogo. Kibong ka nung 'Denomination' balala agizüka yur tesembatsü putu ka nung asenok lishia atar, koda asütsü ? Lai O nung Yisui ashijaji angadi, ajak doktsür Pa meimra asenok Pa den tetemsü asütsü. Tanabuba lima nung liner tashi Yisu shimdi.

Tebu sülen, tetsü sülen, adianu sülen anishidang na aser ni Kotak nung Yisu majurura molumi meyipa arutsü. Yisui ashi, tabensaba arutsü idangji mabensaba süitemtsü, ni aser na Yisu den telemtetba magi-e rata-a alidang iba lima nungi pilara kodang ang lemteta abensatsü mabensai melili.

Malaysia nung Khristan minister, Hannah Yeoh nem tai tongloktsü



Hannah Yeoh

July 10, 2024: Malaysia nung taoba mapang police tongti ketdangser kati Malaysia nung Youth & Sports Minister, Hannah Yeoh-i Khrista osangtajung proker aser iba linük ya Khristan linük ka kümdaktsüner, ta tai tongloktsüogo, ta International Christian Concern (ICC)-i metetdaksü.

Khristan aser Sports Minister, Yeoh-i taoba mapang inspector general of police, Tan Sri Musa Hassan-i la tenüng menüktsüogo, ta shia pa anema ken o benoka liasü.

Court-i Musa Hassan dang, nai minister anema tai tongloktsüba atemaji nü ket nung kulikaket mesüra kuli karbo lir asü mali, ta asügangyaogo.

Ajisüaka Hassan-i pa ket nung kulibo mali ta ashi.

2020 küm University ka nung Hassan-i jembiba o ka ashishia Yeoh-i, Hassan-i la tenüng menüktsüogo ta tai

tonglokja ken o benok.

Iba mapang nungji Hassan-i, Yeoh-i züluba la taküm otsü kaketji Malaysia nunger Khristan yimsü dangi meyipdaksütsü nükjidong nung züluba lir, ta jembia liasü.

Yeoh-i züluba kaket, "Becoming Hannah, A Personal Journey," nungji lai Khristan ka ama la tamang jenjang, la taküm otsü aser la yimtenren nung ajemokba otsü tejangja shia lir.

Yeoh-i, Hassan-i jembiba otemji tiyazü aser yimtenren nung la jenjang raksatsütsü nükjidong nung jembiba otem lir, ta metetdaksü.

Iba ken o ya court nung maneni angadangdar.

Malaysia nung nütsüng shilem 9 dang Khristantem lir aser nütsüng shilem 60 dak temabo Muslim nungertem lir.

Malaysia tesem aika nung nütsüng ajema aliba Khristantem reshikangshi tenüng menüktsüogo ta tai ajurur.

AO OSHI ANGAZÜKDAK:

TANÜ ANGAZÜKTSÜBA OJANG



Tajemtsü

(adj) jemtetbatem, tzü aser mamatsü amala (drinks)

* Nagaland nung tzü tajemtsü tajung angur.

Tajemtsü

(adj) tetsübutüsü, tarendaktsü (fearful)

* Odilai onok dang aonung tajemtsü otsü ashi.

OLONG PAITEP # 6843

15x15 crossword grid with numbers 1-17 indicating starting positions for words.

TIPIEN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S ___ i - (3)
9. Nisung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Majinü - (5)
13. Tzüma nung senzüba - (5)

OLONG PAITEP # 6842 TELANGZÜBA

TIPIEN :

- 2. Bangsemo, 6. Tiptem,
8. Jen, 9. Talila, 11. Aren, 12. Tzübo,
14. Alia, 16. Angati, 17. Odi,
18. Azü, 19. Sünglang.

LANGTSÜNGLEN :

- 1. Yipten, 3. Nüja, 4. Sangro,
5. Milen, 7. Tulu, 10. Laza,
11. Aben, 12. Tiyong, 13. Ajizük,
14. Aitsü, 15. Tasa, 16. Aina.

NAI-A YA METETTER MA



Karnataka kübok Mysuru nung Purna Chetana Public School-i "Purna Chetana World Records Festival 2024" 11 buba amonger.

Iba benjung nung shilem balala agir aser team 9 aser individual world records 5 yanglutsü alizüing lir. Iba benjung nung Purna Chetana Public School-i "Longest Marathon of Assembling Robotic Models by a Team" otsü yangluogo aser iba atema Elite World Records, Asian Records Academy aser India Records Academy ajanga World Record titles agütsüogo.

Purna Chetana Public School nungi kaketshir 132-i "smart village" indang miniature model ka yanglu. Parnok ya telok 68 lemsa aser July 6, 2024 anepdang 6:00 ako nungi aonung 11:52 tashi mapa inyaka liasü. World record norms nung aliba ama telok 68 nungi 66 qualify aser approve asü.

Iba sentong nung Elite World Records nungi Dr Sathysree Guptha aser Dr Hanifa Banu, Asian Records Academy nungi Dr A.K. Senthil Kumar, Dr B. Sivakumaran aser Sudhya S aser India Records Academy nungi K.R. Venkatesvaran aser Dr Jamuna Raju nungertem aden.

Kuki-Zo nungeri village volunteers 3 chioktsü akhanger

Moreh, July 10, 2024

(Agencies): Kuki-Zo nungeri July 10 anepdang 6:00 ako nungi tenzüker nikongdang 6:00 ako tashi parnok aliba tesemtem mokdangogo.

Security forces-i Kuki-Zo nunger dak tashiyim mapa inyaker aser reshikangshir ta tai tonglokja Kuki Inpi Manipur-i lungkak sentong ayonga agiogo.

Kangpokpi nung Kuki Inpi Sadar Hills (KISH)-i iba sentong ketdangsüa agi aser parnoki Keithelmanbi Military Colony nung Vengpi tesem nung sentong tulu ka agi.

Iba mapang essential aser emergency services dak alaka gari ka danga mesenzüdaktsü aser school o shishilembadak ajak shibang.

"Central security forces-i Kuki-Zo volunteers dak dang tenük yoka mapa inyakba magizüker ta Centre sorkar

dang ashitsü atema iba sentong ayongzüker" ta KISH President Thangminlen Kipgen-i ashi.

Kipgen-isa ashiba agi iba sentong ajanga village volunteers pusemer aser tarutsü nung central agencies-i parnok maputsü atema agir.

L Hengjol yimtsüing nung central forces-i Kuki-Zo village volunteers 3 apuba sülen tanü lungkak aitba sentong ayonga agiogo.

Iba mapang sepaitemi village chairman'er ki amakdang osettsüset aika raksatsü aser Kuki-Zo tsürtem yirutsü.

Ajisüaka, Manipur Police-ibo tapurtemji telungpur telok nung züingsemtem lir ta metetdaktsüogo.

Tanü Leimakhong, Saikul, Motbung, Hengbung, Moreh, Churachandpur, New Keithelmanbi aser Kuki-Zo tesemtem nung lungkak aitba sentongtem ayonga agiogo.

Tonghen Haokip'er ki amakba aitsür aser iba ya pa aser par kibong samatsütsü atema inyakba mapa ka lir ta Kuki Chiefs' Association-i ashi.

Kuki Women Organisation for Human Rights aser HTC Moreh dena Kuki nunger telok aikati iba tatalokba aitsüba metetdaktsüogo.

Kuki Inpi Manipur-i Prime Minister Narendra Modi dangi memorandum ka züluba nung Kuki-Zo nunger pungu apuba aitsüba den parnok chioktsü takhangba agütsüogo.

Kuki-Zo nunger temeten kümzüka ayutsü aser yimjung nung alitsü atema administrative setup balaka nungdaker ta parnokisa ashi.

Committee on Tribal Unity Sadar Hills-ia lungkak aitba sentongtem tuluba ayonga agitsü amokmerena metetdaktsüogo.

Meghalaya CM-i Garo lanur ka asüba bushisüngdangtsü mepishir

Shillong, July 10, 2024

(Agencies): Goalpara district nung rehabilitation center ka nung Garo nunger Niksamseng Ch Marak asüba bushisüngdang asütsü atema Meghalaya chief minister Conrad Sangma-i

Assam chief minister Himanta Biswa Sarma dangi shidi ka zülüogo. Niksamseng Ch Marak ya July 2 nü Assam police-i apu aser anogo ana lir New Life Foundation Centre, Nayapara nung sür lia angu. Pa temang nung zübotem keta liasü ta Conrad Sangma-i ashi.

Rehab center-ibo pa soseta asü ta ashir saka Niksamseng'er kinungertemi pa reshikangshiba aser züka merenshiba ashir ta pai ashi.

"Tasür kibong nem temeten agütsütsü atema bushisüngdang asütsü mepishir. Iba dak sendakba nung tasür kibongi First Information Report (FIR) benokogo" ta Conrad-isa ashi.

Achik State People's Front (ASPF) aser Garo Jatiya Parishad (GJP) ajanga ken o benokba nung ajemdaker police-i Bharatiya Nyaya Sanhita (BNS) kübok FIR benokogo.

Iba dak sendakba nung police-i nisung 7 pua lir. Rehab center nung caretaker Jintu Chakravorty (24) dak tongti süa tai tonglokja lir.

Tanüingba nisungtemji Prasenjit Nath (23); Hanif Ali (28); Dhanmaina Banikya (38); Mohsen Khan aser Kunal Das (23) nunger lir.

Police-isa tanur ka apu saka pa Goalpara nung juvenile center kati anienogo. Maneni, Goalpara Civil Hospital nung nisung ka yiru anepaludar aser pa kobi melii aputsü aser tai tonglokja alir nisung ana jena orr mangu bushitepdar.

Zoram Medical College ajungkettsü atema Centre dang sen meshir

Aizawl, July 10, 2024

(Agencies): Mizoram sorkari Centre sorkar dang Zoram Medical College (ZMC) jenjang ajungkettsü atema senotsü teyari meshiogo.

Chiefminister Lalduhoma-i Union Health Minister JP Nadda den ajurutepdang ZMC ya kanga tongtipang ta ashi aser jenjang ajungkettsü atema Centre-i senotsü teyari agütsütsü mepishi.

Tenatisa medical college nung critical care block ka amenoktsü aser Mizoram nung

health sector ajungkettsü atema onük kar lemsatep.

Union Minister Nadda-i tekaratiba nung senotsü teyari agütsütsü ta Lalduhoma dang nangzüker.

Taküm June ita Nadda-i Zoram Medical College renloktsü atema Special Package kübok Rs 170 crore agütsütsü nangzüka lir.

Chief Minister Lalduhoma-i tawa New Delhi semdangba nung Union Minister aika ajurutepa den sendentem menogo.

Nadda den majurutepdang

Lalduhoma-i Minister of Road Transport and Highways Nitin Gadkari den ajurutepa Mizoram nung highway projects indang lemsatep.

Lalduhoma-isa DoNER and Communications Minister Jyotiraditya Scindia, Parliamentary and Minority Affairs Minister Kiren Rijiju, Minister of State for External Affairs and Textiles Pabitra Margherita, National Security Advisor Ajit Doval aser Union Home Secretary Ajay Bhalla nunger dena ajurutepogo.



Northeast Frontier Railway ajanga Tetelia station yard nung Road Over Bridge (ROB) yangluba tanü lapokogo. Iba ROB (No.59A) ya Northeast Frontier Railway-i Rs. 72 crores endoka yanglu aser July 10, 2024 nü lapok ta NFR nung CPRO Sabyasachi De-i ashi. Iba ROB ajanga Sonapur aser Morigaon district nung alirtem kanga anisüngzüktüsü ta pai ashi.

Israeli military-i Hezbollah pur tamendakdak ka amak

Jerusalem, Chiteni/July 10 (Agencies): Israeli military-i ashiba agi, parnoki Lebanon teyongtsü nung Hezbollah pur tamendakdak ka makogo. Gaza nung rara adoker aliba mapang telok ana tsüngda maneni khatempa arudar.

Bodhbarnü Telegram nung post ka ajanga Israel military-i ashiba agi, parnoki Mongolbar aonung Janta yimtsüng koba linük yimtiba Beirut nung km 79 shi pilar lir iba yimtsüng anasa Hezbollah pur indang air defence systems ka maka liasü.

Yimya agi Israel military-i arrtsü anasa aliba tesem balala dang amaker saka tang Lebanon teyongtsü nunga tesem ka makogo.

Mongolbar aonungsa Israel air force-i, Baraachit jila nung Hezbollah indang air defence tesem ka aser Kfar Kila nung prangbong injang aser hadir

balala bendena ayuba tesem ka makogo, ta military-isa shisem. Lebanon anüolentip len Marjayoun jila nungi Al Jazeera osangbener Assed Baig-i ashiba agi, Israel-i artillery, drone aser missile amshia amakba mapang Bekaa Valley nung Yaroun, Haddatha, Hula, Toulin aser al-Nabi Shayth kübok tesem balala dak kongshiogo.

Syria aser Israel-i atsünger aliba Golan Heights nung Israel aser Hezbollah na khatempa sülen anogo ka lir iba ya ataloka liasü.

Mongolbarnü Israel-i mezüngbuba Syria-Lebanon arrtsü anasa Hezbollah pur indang gari ka ama aser iba mapang nisung ana tepseta liasü, ta Syrian war monitor kati ashi.

Hezbollah ketdangsür kati Associated Press news agency dang ashiba agi, asür rongnung ka taoba mapang iba

telok lenir Hassan Nasrallah indang bodyguard liasü.

Iba sülen mapang tatsüka lir Hezbollah-i pa tenüng ya Yasser Nimr Qarnabsh ta sangdonga liasü.

Kasa mapang nung Hezbollah-ia telangzüba agüja Golan Heights nung Israel indang military base ka ama aser iba mapang nisung ana tepseta liasü, ta Israel police-i ashi. Israel indang rescue service-i ashiba agi, asür ana ya civilian liasü.

Israel-i Lebanon amak tenzüka sülen October ita nungi tang tashi nung nisung 543 tepsetogo aser Hezbollah aser Lebanon nung tang telungpur teloktemi Israel nung nisung 21 tepsetogo.

Kasa mapang nung arrtsü nung aliba Israel aser Lebanon nung civilian meyirejang aika pei talidak nungi aninogo.

SÜR KÜM 3 AJUNGBA MENUNGRA BILEMTETER



Asür Mrs. Chubala Yaden
Tasüba anogo : 11/07/2021

Pongmang ka amia dang bilemer saka asangsang nung nai onok toktsür or tanü agi küm 3 apensar, saka onok mulungjang nung na teti alir.

Nü temeim mapatem, nü sayu o tajung, nu tamang sarasadem, akümü peyong kangki lemang nung jajaba item bilemtetdang onok mulung süngzüker.

Tanü na onok den meliaka asenok ajak kenü anogo Kodak nung ajurutsü.

~ Temeim kinungbo, chirnurtüm, semchirtüm Amolatem aser kinungertem.

Ethiopia PM-i Sudan army tekolakba den ajurutep

Khartoum, Chiteni/July 10 (Agencies): Ethiopia Ato Kilonser Abiy Ahmed-i Sudan army tekolakba General Abdel Fattah al-Burhan den ajurutepogo. Sudan nung military aser paramilitary Rapid Support Forces na tsüngda mangatettep adoker aliba tembangdaksütsü atema parnok meketa aliba linüktem aser alima nung tashitait linüktemi inyaktepa arudar.

General al-Burhan aser taoba mapang pa indang deputy, Mohamed Hamdan Dagalo-i aniba RSF na rartep tenzüka sülen 2023 küm April ita nungi tenzüka Sudan mepetmesü tulu nung arudar.

Ahmed-i Mongolbarnü sorkar den sendaktepa aliba army amendaker aliba Port Sudan jila semdangba ya rara tenzüka sülen tongtibang lenir kati linük semdangba mezüngbuba asütsü. Iba rara

ajanga nisung million aika pei talidak ki toktsür jenshiaogo aser alima nung humanitarian crisis tulutiba adokdaksüogo.

Sudan Sovereign Council-i sangdong ka ajanga ashiba agi, iba senden ya linük ana tsüngda tesendaktep tajung aliba kuli lir.

Ahmed indang press secretary-i Al Jazeera dang ashiba agi, Ethiopia lenir-i iba linük semdangba ya yimjung aser security atema lir.

Port Sudan nung Al Jazeera osangbener Mohamed Vall-i ashiba agi, Ahmed-i kechi onüksa benok iba indang osang tejangja memetet.

Senden nung al-Burhan-i, Ahmed nem RSF puri state aser institutions tem anema nokdakba mapang aibelenbatem indang metetdakja liasü, ta council-i ashi.

Rara nung aibelenba atema United Nations ketdangsürtem

asur international rights groups temi telok anaprongla aitsüogo.

“Uganda nung yimjung asoshi sensaksemsü akok ta jembishinüa aliba mapang tang lenir ana ajurutepogo. Iba dak alia PM Abiy-i Sudan semdangba ya military lenirtem atema anisüngzüka asütsü, shirnoki linüktem timba kati parnok sentokatoker ama bilemer,” ta Vall-i ashi.

Al-Burhan-i aniba teloki Africa anütoklen aliba linüktemi rara tembangdaksütsü atema jenjang agibatem magizüker arudar, aser meyiper regional lenirtemi RSF pusemba atema parnok aitsüogo.

Tawa Al Jazeera den sensaksemsa mapang al-Burhan-i, iba rara ajanga shirnok Sudan nung aser Sudanese state tsükchir aser tembar lir aji jangja jangja metetogo, ta ashi.

Biden-i Ukraine nem air defences teyari agütsütsü nangzük

Washington, Chiteni/July 10 (Agencies): US Tir Joe Biden-i Washington DC nung NATO lenirtem pela agizükba o jembidang Russia-i amakba den tokteptsü atema Ukraine nem strategic air defence systems tasen pongu agütsütsü nangzük.

NATO senden tenzüka o tatsüka süaka sashi-sashia jembidang Russia aser Ukraine tsüngta raraba nung tangya tongtipang mapang ka lir aser military alliance (NATO) ya tangsa tashi taitba lir, ta US tiri sangdong.

Iba rara nung civilian tem asü-amaba tali akumba mapang ka nung US-i Germany, Italy, Netherlands aser Romania den lungjemer Patriot missile batteries aser danga system tem Ukraine nem teyari agütsütsü, ta Biden-i ashi.

Russia indang missile ka Ukraine yimtiba Kyiv nung tilatanur indang mozüki ka nung khaloktsür anogo ana dang lir iba osang ya sangdong.

Hombarnü linük tesem balala nung amakdang nisung 43 shi asü aser noklang dak tema yiru, ta ketdangsür temi ashir. Russia-

i Hombarnü amakba tenüng magir, saka UN aser teshisadanger temi Moscow tenüng asener.

Tir Volodymyr Zelensky-i ita aika anüolen par tembar linüktem dang air defences teyari tali agütsütsü ajungshia arur.

NATO-i strategic air defence systems pongu den tilaba strategic anti-air batteries aika tenla agütsütsü sentong lir.

“Ukraine ya shinga talenba kübok melie independent linük ka süa rara ya atemtsü. Russia-i takok mangutsü. Ukraine-i takok angutsü,” ta Biden-i Mongulbar nikongdang ashi.

Tir Biden-i minute 13 shi ola tejangja nung jembia liasü, saka pai taoba ita Trump den tir asoshi o intepba mapangbo o kanga kamia jembia liasü.

Bendang aina oa aliba tembar aser linük nung alirtem dang pai election nung Donald Trump madak takok angutsü ta shiner amai jembiba mapang “autocrats” (tematiba tashi aliba yimsüsür) temi alima yimya melenshitsüogo ta ashi.

(Maneni tapak 8 nung...)

WORLD POPULATION DAY 11 JULY 2024

OMEN "TETSÜASER TANUR ANEMAALITSÜ MECHITANURABENBA TETSÜNGTA MAPANG SHIDAK ALITSÜLA"

TETSÜASER TANUR TEMANG JUNGA ALITSÜATEMATANUR ANA TSÜNGTA MAPANG PERIA (KÜM 3) AYUTSÜLA.

PLAN YOUR FAMILY-TANUR ASOTSÜATEMA ARISHI KÜM 20 SÜLENTAJUNGBA.

TANUR ASOBA SÜLEN MESÜRA ABORTION SÜLEN FAMILY PLANNING YIMYAMSHIANG.

"VIKSHIT BHARAT INDANG MAITSÜ TASENBA, FAMILY PLANNING YA APUANI AJAK INDANG AKHUM"

JULY 11 NUNGI 24, 2024 TSÜNGTA FAMILY PLANNING FORTNIGHT MAPANG STATE TESEM AJUNGALEN GOVERNMENT HOSPITAL NUNGI ITEM FAMILY PLANNING SERVICESANGATIAGIANG-

- * Teti atema Family planning yimya (Tebur atema vasectomy aser Tetsür atema Tubectomy)
- * Khen atema Family planning yimya (Copper-T, Condom, Oral Contraceptive, PPIUCD, IUCD-380A &375)

COMPENSATION YAMAI AGIANG

- * Rs 2000/- TUBECTOMY (Interval & Post Abortion) atema
- * Rs 3000/- POST-PARTUM STERILISATION atema
- * Rs 300/- PPIUCD & PAIUCD shia atema
- * Rs 3000/- VASECTOMY atema
- * Accredited Private/ NGO Facilities nunga compensation angutsü.

* District Hospitals ajak nung compensation dener Injectable Contraceptive angur.
* District tem nung Family Planning Camps ayongzüktsü.

FOR MORE INFORMATION CONTACT THE Chief Medical Officer's Office/ Nearest Health Center.

Euro nung goal idaktsüba asayar tanobusang Yamal kümogo



Chiteni/July 10, 2024

(Agencies): Arishi küm 16 tain Spain nung asayar Lamine Yamal, European Championship nung goal idaktsüba asayartem rongnung tanobusang kümogo. Mongolbarnü Euro semifinal nung France goal 2-1 agi akokba asaya nung pai goal idakja liasü.

Yamal Berlin nung England mesüra Netherlands den final masaya tsüngda Honibarnü küm 17 ajungtsü.

“Ni takok dang aginer. Ni kü tasoba anogo Germany nung ozü team den amungtsü,” ta Yalam-i ashi shiba nem player of the match naroküm agüja

Asaya nung Yamal-i minute 21buba nung 25 yards nungi France goalkeeper Mike Maignan ajanga goal tajung ka metsüokja liasü.

“Iba ya asayamung nung goal tajungtiba asütsü masütsü ni memetet, saka iba goal ya kü atema kanga tongtibang lir, kechiyong iba goal ya European Championship nung kü atema mezüngbuba goal lir,” ta pai ashi.

Yamal ya arishi küm 16 anogo 362 tain lir. Taoba mapang European Championship nung goal idaktsürtem rongnung tanobusangji Switzerland

nung asayar Johan Vonlanthen liasü. Pai Euro 2004 nung France den asayaba mapang goal idakja liasü.

“Ni takok tashi aika mebilemtsü meranger aser asaya jangradema asaya-a team nem teyari agütsütsü dang meranger aser ni aginüba ama asayatetra ni pelar,” ta pai ashi.

Croatia goal 3-0 agi akokba asaya nung mezüng asayaba sülen Yamal ya Euro nung asayartem rongnung tanobusang aküm.

Pa arishi küm 15 asüba mapang Spanish league nung asaya tenzük aser iba league nung asayar tem rongnung tanobusang akümba den Champions League nunga asayartem rongnung tanobusang aser Spain team nungi goal idaktsüba asayartem rongnung tanobusang aküm.

Asaya nung mezüngbuba goal ya France atema Randal Kolo Muani-i idaktsü, ajisüaka mapang tatsüka dang lir Yamal-i Spain atema goal ka idakja goal kasasa aküm. Maneni asaya nung Dani Olmo-i metsüba ball ka France defender Jules Koundé dak tsükdaker aiba sülen Spain team goal ka agi tejakdang aküm aser parnoki asaya koka liasü.

Copa America: Argentina-i goal 2-0 agi Canada koka final-i iogo

Chiteni/July 10, 2024 (Agencies): Mongolbarnü Copa America mezüngbuba semifinal nung defending champions Argentina-i goal 2-0 agi Canada koka final tongtetogo.

Asaya tetenzüklen Canada team-i Argentina kanga nongshia asaya ajisüaka Alvarez-i minute 22buba nung par team atema mezüngbuba goal idakja parnok tejakdang aküm.

Asaya tepeyong goal idaktsütsü atema Messi-i maongka nguteta liasü aser pai minute 51buba nung pai par team atema tanabuba goal idakja liasü.

Deobarnü Miami Gardens, Florida nung final asaya nung parnok Uruguay mesüra

Colombia na rongnung ka den asayatsü.

Iba asaya nung Messi-i international goal 109buba idaktsüogo. Pai Argentina team nungi taoba asaya 25 nung goal 28 idaktsüogo aser Copa America asayamung nung goal 14buba idaktsüogo aser otsü tasen ka yanglutsü atema goal asem dang nungdaka lir.

Portugal nung asayar Cristiano Ronaldo-i (goal 130) dang Messi dang nungi international goal timba idaktsür lir. Messi June 24 nü arishi küm 37 jungogo aser joko mapang talangkabo asayatsü mimlar.

Independence day nü asaya akokba sülen Argentina team asaya 10 tashi khen danga tamakok mongui asaya arudar. Parnok Copa title 16buba

abentsü atema asayaba mapang ka lir.

Copa America nung 38benbuba asayaba mapang Messi tetsüng yiruba ajanga Argentina pur group stage asaya tatembangbuba nung shilem magiteti liasü ajisüaka Ecuador den quarterfinal asaya nungbo pa minute 90 asaya liasü.

Kasa asaya nung Canada nung nungtugu asayar Alphonso Davies tetsüng tachichilen yiruba sülen minute 71buba nung tuguatok.

Asaya mezüngbuba shilem nung Jonathan David-i metsüba ball ka Emiliano Martinez-i kanga junga nokdang aser minute 80buba nunga Tani Oluwaseyi-i metsüba ball Martinez-i nokdanga liasü.

Gambhir India cricket team head coach kümogo

Chiteni/July 10, 2024 (Agencies): BCCI Secretary Jay Shah-i Moingolbarnü sangdong ka ajanga India tebur team head coach asütsü Gautam Gambhir shimba sangdongogo.

Shah Twitter ajanga iba osang sangdonga liasü. “Ni Indian Cricket Team head coach tasenba ama Gautam Gambhir pelashishia agizüker. Pa indang career nung shilem balala nung takok ngua inyakba

sülen Gautam lenisüba nung India nung cricket asaya tejakdangi anir aotsü ta temulung lema bilemer,’ ta pai ashi.

Kasa mapang nung Gambhir-isa X ajanga, “India ya kü maitsü aser linük tenzüktsü asoshi maongka anguba ya kü taküm nung maongka tulutiba lir. Ni shilem tanga ka agitsü atema meyipa aruba atema kanga pelar, ajisüaka nükjiongbo teti ama kasa dang lir, koba India

nema dangdaktsütsü asoshi lir,” ta pai ashi.

Gambhir-i Rahul Dravid ket nungi head coach mapa melenzükogo, shiba T20 World Cup akokba sülen mapa nungi anenogo.

Gambhir lenisüba nung India team mezüngbuba asaya Sri Lanka den T20I asem aser ODI asem asayatsü, ajisüaka iba asayamung nung Rohit Sharma, Virat Kohli, aser Jasprit Bumrah nungerto masayatsü.

Mokokchung District Cricket Association-i metetdaksür

Dimapur, Chiteni/July 10 (TYO): Mokokchung District Cricket Association (MDCA)-i sangdong ka ajanga, Nagaland Cricket Association (NCA)-i ayongzükba open trials nung shilem agitsü jangra aliba asayartem nem recommendation letters agütsütsü atema aser kuli kaketem asadangshitsü asoshi asayartem jaokba metetdaksüogo.

Iba sentong ya July 12 aser 13 nü nikongtsütsü 2 ako nungi 4 akok tashi Practice Pitch, Imkongmeren Sports Complex nung agitsü.

NCA Open Trials nung shilem agitsü jangrartem ajak

kuli kaket asadangshiba nung shilem agitsü nungdaker. Asayartemi temalen shisema aliba tesemi kuli kaket tejangja bener arutsü nungdaker.

Kuli kaketem ajak takok ngua asadanga sülen Association-i asayartem nem recommendation letter ka agütsütsü.

Ken o dak sendakba nung osang tejangjaba agitsü atema asayartemi MDCA office (8794269121, 9089777143) den tongteprateptettsü, ta MDCA tir Imlikumzuk aser General Secretary Rimachang Aier nati külem sangdong ka ajanga metetdaksüogo.

BENDANGLI OSANG : Tapak 7 nungi...

Biden-i Ukraine nem air defences...



Kasa mapang Biden-i party aniba indang jembitsü atema congressional Democrats tem senden ka amen ta ashir.

Mongulbarnü Democratic party nungi House of Representatives tenet buba, Mikie Sherrill (New Jersey) ajanga Biden dang US tir election nung tanaben metokteptsü ashi.

Bendang lima nungi adenshiba lenirtemia Biden dak tamang makaba lemsatapa liasü. “Taoba ita o intepba sülen pa jenjang tajungba akumtsü teimla kangabo mangur. Pa ano küm pezü tali US aser NATO lenir asütsü nükla kangabo majiteter,” ta European envoy kati osangbener dang ashi.

Ajisüaka par teloki arishi küm 81 tain ya tir mapa inyaktetsüsa temang junga lir ta ashir.

Küm ana tejakdang nungi Russia-i Ukraine maka arudang NATO ulushiba atema White House-i Biden nem tenüngsang agütsü. Iba alliance nung Finland aser Sweden züngsem kumogo.

NATO züngsem linük 32 nungi lenirtem US linük yimtiba nung senden mentar. Item rongnung UK indang Ato Kilonser tasenba Keir Starmer dena lir. Pa Washington-i

maodang Labour party-i tashi ita aser anokshitsü mokoki NATO yariba jangjashitsü asoshi pelar, ta shia liasü.

Osangbener temi pa dang nai Russia Tir Vladimir Putin dang kechi ashir ta asüngdang dang, iba lokti adenshiba ya NATO allies tem Ukraine den lungjemer nokdaka aliba temaitsü tejangja ka lir, ta Keir-i ashi.

Hopta tetenzüklen Kyiv nung tila-tanur indang mozüki ka amakba ajanga onok temulungtetba tali tashi itshir, ta pai ashi. UK-i Ukraine nem teyari agütsüba ya taoba mapang dang nungi tali asütsü iba senden nung jembitsü, ta paisa ashi.

Küm aika jakdang iba NATO indang treaty ya tang sentepa aliba tesem nung zülutepa liasü, aser iba indang Biden-i jembidang amshia jemi.

Pa o tatemi Biden-i NATO Secretary General Jens Stoltenberg sapangi jaketa Presidential Medal of Freedom, America nung civilian nem agütsüba konang tematiba agüja liasü.

Mongulbar nikongdang Doral, Florida nung par golf club nung nübuyimba mapang arishi küm 78 tain Trump-i NATO aika liasü.

NATO züngsem linük temi defence nung gross domestic product shilem 2 bosa indoktsü nükjiong ayuba ama meinyaktetba atema Trump-i aija liasü. Russia-i Ukraine amakba sülenbo NATO linük aikati iba nükjiong tongteta inyaker.

BILEMDANGANG

“Mapa tasen ka angazüktsü atema kecha temonu mali.”